

REGLUGERÐ

fyrir Lífeyrissjóð starfsmanna Akureyrarbæjar.

1. gr.

Nafn sjóðsins er Lífeyrissjóður starfsmanna Akureyrarbæjar. Sjóðurinn var stofnaður með samþykkt bæjarstjórnar Akureyrar og tók til starfa 1. janúar 1942. Sjóðurinn er eign bæjarsjóðs Akureyrar og sjóðfélaga með þeim takmörkunum, sem leiða af ákvæðum reglugerðar þessarar.

2. gr.

Hlutverk sjóðsins er að sjá sjóðfélögum, eftirlifandi mökum þeirra og börnum fyrir lífeyri samkvæmt þeim reglum er greinir í reglugerð þessari.

3. gr.

Sjóðfélagar eru allir starfsmenn Akureyrarbæjar og stofnana hans 16 ára og eldri sem ráðnir eru hjá þessum aðilum í hálfstarf eða meir í fulla tólf mánuði og falla undir reglur um réttindi og skyldur starfsmanna Akureyrarbæjar. Starfstími þarf ekki að vera samfelldur. Þeir sem njóta elli- eða örorkulífeyris úr sjóðnum teljast sjóðfélagar. Þeir starfsmenn Akureyrarbæjar og stofnana hans, sem skytt er að greiða iðgjöld til annarra lífeyrissjóða sem stofnaðir eru með lögum fyrir tilteknar starfsgreinar sérstaklega, skulu ekki gerast sjóðfélagar í þessum sjóði, vegna starfa er gjaldskylda til slíkra sjóða fylgir.

4. gr.

Stjórn sjóðsins skipa bæjarstjóri sem er formaður sjóðstjórnar tveir bæjarfulltrúar sem bæjarstjórn kýs á sama hátt og fastar nefndir til fjögurra ára og tveir sjóðfélagar tilnefndir til fjögurra ára af starfsmannafélagi Akureyrarbæjar. Fjórir varamenn skulu tilnefndir á sama hátt og til jafnlangs tíma.

5. gr.

Bæjarskrifstofur annast reiknishald sjóðsins innheimta tekjur hans og inna af hendi greiðslur úr honum samkvæmt reglugerð þessari og ákvörðunum sjóðstjórnar.

6. gr.

Reikningsár sjóðsins er almanaksárið. Ársreikning skal semja jafnframt ársreikningi bæjarsjóðs endurskoða hann og úrskurða á sama hátt og reikninga Akureyrarbæjar og stofnana hans.

7. gr.

Sjóðstjórnin skal halda fundi svo oft sem þörf er á. Skal hún halda gerðarbók og skrá í hana allar samþykktir sínar og það sem máli skiptir fyrir sjóðinn og sjóðfélaga.

8. gr.

Stjórn sjóðsins getur fimmta hvert ár látið tryggingafræðing rannsaka fjárhag sjóðsins. Auk þess er stjórn sjóðsins skylt að láta rannsókn fara fram á fjárhag sjóðsins hvenær sem telja má hættu á að veruleg breyting til hins verra hafi orðið á fjárhag hans frá síðustu athugun. Leiði rannsókn á sjóðnum í ljós að fjárhagur hans sé ótryggur skal tryggingafræðingurinn gera tillögur til sjóðstjórnar um á hvern hátt skuli efla sjóðinn.

9. gr.

Sjóðfélagar greiða 4% af föstum launum sínum fyrir dagvinnu persónuuppbót og orlofsuppbót í iðgjöld til sjóðsins. Launagreiðanda ber að halda iðgjöldum eftir af launum sjóðfélaga og reiða þau til sjóðsins innan tveggja vikna. Sjóðfélagar bera eigi ábyrgð á skuldbindingum sjóðsins nema með iðgjöldum sínum. Launagreiðendur greiða í iðgjöld til sjóðsins 6% af þeim föstu launum fyrir dagvinnu persónuuppbót og orlofsuppbót er sjóðfélagi tekur hjá þeim. Skulu þau greidd til sjóðsins samtímis iðgjöldum sjóðfélaga. Þegar sjóðfélagi hefur greitt iðgjöld til sjóðsins í 32 ár falla iðgjaldagreiðslur hans niður svo og iðgjaldagreiðslur launagreiðanda hans vegna nema hann ætli að nota 95 ára regluna sbr. 12. gr. Þó er sjóðfélagi er gegnt hefur um lengri eða skemmri tíma hlutastarfi heimilt að greiða áfram iðgjald til sjóðsins af föstum launum sínum fyrir dagvinnu allt að því marki að jafngildi iðgjaldagreiðslu af launum fyrir fullt starf í 32 ár. Launagreiðanda skal þá skylt að greiða iðgjald að sínum hluta sbr. 3. mgr. þessarar greinar.

10. gr.

Bæjarsjóður ábyrgist skuldbindingar sjóðsins.

11. gr.

Stjórn sjóðsins skal sjá um ávöxtun á fé hans og skal það gert á eftirfarandi hátt: 1. Í ríkisverðbréfum. 2. Í skuldabréfum sem tryggð eru með ábyrgð ríkissjóðs. 3. Í skuldabréfum bæjar- og sveitarfélaga. 4. Í skuldabréfum fjárfestingarlánasjóða sem starfa samkvæmt lögum, þ.á.m. veðdeild banka. 5. Í bönkum og sparisjóðum sem fullnægja ákvæðum laga nr. 87/1985. 6. Í skuldabréfum tryggðum með veði í húseignum allt að 50% af brunabótamatsverði, eða sé brunabótamat ekki fyrir hendi þá af matsverði, sem ákveðið er af tveim mönnum, sem sjóðstjórn tilnefni og allt að 75% af fasteignamatsverði lóða í kaupstöðum og kaupúnum. 7. Í hlutabréfum. Ekki skal verja meiru en 10 % af ráðstöfunarfé sjóðsins til hlutabréfakaupa, þá má hlutabréfaeign ekki nema meiru en 15% af eignum sjóðsins á hverjum tíma. Ennfremur er lífeyrissjóðnum óheimilt að eiga meira en 10% af hlutafé í hverju hlutafélagi. Til þess að fullnægjandi áhættudreifing sé tryggð, skal stjórn sjóðsins setja reglur um hvernig hlutabréfakaupum skuli háttað. Skal þar m.a. kveðið á um hámarkseign sjóðsins í einstökum hlutafélögum, samsetningu hluta í félögum sem fjárfest er í (m.t.t. t.d. fjölda hluta - alm.hlutafél. / samstæðna / skráningu á verðbréfafingi o.fl.) og mat á verðmæti hluta. Auk ítarlegri ákvæða um hámarkseign sjóðsins í einstökum hlutafélögum. Skulu þar til hliðsjónar hafðar reglur Verðbréfafings Íslands um skráningu hlutafélaga, eftir því sem við getur átt.

12. gr.

Hver sjóðfélagi sem greitt hefur iðgjöld til sjóðsins hefur rétt til eftirlauna þegar hann hefur náð 65 ára aldri enda láti hann þá af starfi sínu og skyldur er hann að láta af starfi sínu í lok þess mánaðar er hann nær 70 ára aldri. Þegar sjóðfélagi hefur náð því að samanlagður lífaldur og iðgjaldagreiðslutími sé 95 ár, hann orðinn 60 ára og lætur af störfum, á hann rétt á lífeyri úr sjóðnum. Sjóðfélagi sem notfærir sér þessa reglu skal greiða iðgjald til sjóðsins þar

til 95 ára markinu er náð. Lífeyrisréttur hans skal vera 2% fyrir hvert ár í fullu starfi sem iðgjöld hafa verið greidd fyrir en hlutfallslega lægri fyrir skemmra starfstímabil og minna starfshlutfall en ekki meira en 64% að náðu 95 ára markinu. Iðgjaldagreiðsluskylda fellur niður þegar 95 ára markinu er náð. Lífeyrisréttur skal aukast um 2% fyrir hvert ár í fullu starfi frá því að iðgjaldagreiðslu lýkur og þar til taka lífeyris hefst. Nottfæri sjóðfélagi sér ekki þessa reglu áður en hann nær 64 ára aldri skal um iðgjaldagreiðslu hans og lífeyrisrétt fara eftir hinni almennu reglu um lífeyri og þá endurgreiða honum iðgjaldagreiðslur umfram 32 ár. Upphæð eftirlauna er hundraðshluti af þeim föstu launum fyrir dagvinnu persónuuppbót og orlofsuppbót samkvæmt kjarasamningi er á hverjum tíma fylgja stöðu þeirri fyrir fullt starf er sjóðfélaginn gegndi síðast. Hundraðshluti þessi fer eftir iðgjaldagreiðslutíma og starfshlutfalli sjóðfélagsins og er 2% fyrir hvert ár í fullu starfi sem iðgjöld hafa verið greidd fyrir en hlutfallslega lægri fyrir minna starfshlutfall. Fyrir hvert ársstarf eftir að iðgjaldagreiðslu lýkur og þar til sjóðfélaginn öðlast rétt til að láta af störfum og fá eftirlaun bætist við 1% af föstum árslaunum fyrir fullt starf en 2% fyrir hvert fullt ársstarf eftir að iðgjaldagreiðslu er lokið og hann hefur öðlast rétt til að fá lífeyri. Hafi sjóðfélagi gegnt hærri launuðu starfi eða störfum að minnsta kosti 10 ár fyrr á sjóðfélagstíma sínum skal miða lífeyrinn við hæst launaða starfið enda hafi hann gegnt því í að minnsta kosti 10 ár ella skal miða við það hærri launaða starf sem hann að viðbættum enn hærri launuðum störfum gegndi í að minnsta kosti 10 ár. Heimilt er stjórn sjóðsins að greiða eftirlaunaþegum á aldrinum 65 ára til 67 ára uppbót á eftirlaun allt að einstaklingslífeyri almannatrygginga. Það er skilyrði fyrir slíkri uppbót að sjóðfélaginn sé ekki lengur fullfær um að gegna starfi sínu. Til sönnunar því ber viðkomandi að leggja fram umsögn yfirmanns síns um starfshæfnina og vottorð trúnaðarlæknis sjóðsins um heilsufar. Á meðan starfsmaður gegnir áfram starfi eftir að hann hefur verið frá því leystur eða hann fær af öðrum ástæðum áfram greidd óskert laun sem starfinu fylgja á hann ekki jafnframt rétt til lífeyris.

13. gr.

Vaktavinnufólk það er þeir sjóðfélagar sem hafa vinnutíma sem hreyfist með reglubundnum hætti skal fá rétt til sérstaks viðbótarlífeyris (ellilífeyris, örorkulífeyris eða makalífeyris) úr lífeyrissjóðnum enda sé því skylt að greiða iðgjald af vaktaálaginu til sjóðsins. Sama gildir um næturverði og það starfsfólk sem hefur vinnuskyldu eingöngu á næturnar það er á tímabilinu frá kl. 22.00 - 9.00 og skal þá álagsgreiðslan verða grundvöllur iðgjalda og lífeyrisréttinda. Sjóðfélagi greiði 4% af vaktaálaginu í iðgjöld og launagreiðandi 6%. Stjórn lífeyrissjóðsins ákveður á hverjum tíma hver skuli vera viðmiðunarmánaðarlaun þau sem lífeyrinn ákvarðast af og iðgjald er metið eftir. Breyti stjórn lífeyrissjóðsins viðmiðunarmánaðarlaunum skal hún jafnframt ákveða hvort og þá hvernig umreikna skuli áunnin lífeyrisrétt fyrri ára. Iðgjaldagreiðslur sjóðfélaga af vaktaálagi skulu ár hvert metnar þannig til lífeyrisréttinda að reiknað sé hvaða iðgjaldagreiðslur ársins samsvara margra mánaða iðgjaldagreiðslu af viðmiðunarlaunum. Fyrir jafngildi hvernar 12 mánaða iðgjaldagreiðslu ávinnst réttur til ellilífeyris sem nemur 2% af viðmiðunarlaunum.

14. gr.

Hver sjóðfélagi sem greitt hefur iðgjöld til sjóðsins á rétt á örorkulífeyri ef hann verður fyrir orkutapi er tryggingayfirlæknir metur 10% eða meira. Örorkumat þetta skal aðallega miðað við vanhæfni sjóðfélaga til að gegna starfi því er hann hefur gegnt og aðild hans að sjóðnum er tengd. Þrátt fyrir örorku á engin rétt á örorkulífeyri meðan hann heldur fullum

föstum launum fyrir starf það er hann gegndi eða fær jafnhá laun fyrir annað starf sem veitir lífeyrissjóðsréttindi og aldrei skal örorkulífeyrir vera hærri en sem nemur þeim tekjumissi sem sjóðfélaginn hefur sannanlega orðið fyrir sökum örorkunnar. Hámark örorkulífeyris miðast við áunnin lífeyrisrétt samkvæmt 12. og 13. gr. Hafi sjóðfélaginn greitt iðgjöld til sjóðsins á undanfarandi 12 mánuðum miðast hámark örorkulífeyris þó við áunnin lífeyrisrétt samkvæmt 12. og 13. gr., að viðbættum einstaklingslífeyri almannatrygginga. Ef rekja má aðalorsök örorkunnar til starfs í þágu stöðu þeirrar sem öryrkinn gegndi síðast skal þó reikna áunnin lífeyrisrétt eins og sjóðfélaginn hefði gegnt stöðu sinni til 65 ára aldurs og skulu áunnin lífeyrisréttindi þá reiknast af launum í því starfi sem sjóðfélaginn gegndi síðast eins og þau eru á hverjum tíma. Sé örorka sjóðfélagsins á milli 10% og 50% er örorkulífeyrir hans sami hundraðshluti af hámarksörorkulífeyri og örorkan er metin. Sé örorkan metin 50% til 75% er örorkulífeyririnn 50% af hámarkinu að viðbættum 2% af því fyrir hvert 1% sem örorkan er metin umfram 50%. Sé örorkan metin 75% eða meira greiðist hámarksörorkulífeyrir að frádregnum örorkulífeyri almannatrygginga. Þegar öryrki sem er metinn undir 75% nær 65 ára aldri fær hann greidd eftirlaun samkvæmt ákvæðum 12. og 13. gr. Frá sama tíma fellur niður örorkulífeyrir hans. Þó skal hann halda til 67 ára aldurs þeim hluta hans sem miðaður er við lífeyri almannatrygginga. Skyld er öryrkja sem sækir um örorkulífeyri úr sjóðnum eða nýtur hans að láta stjórn sjóðsins í té allar þær upplýsingar um heilsufar sitt sem nauðsynlegar eru til að dæma um rétt hans til örorkulífeyris. Stjórn sjóðsins er heimilt að lækka eða fella niður örorkulífeyri þeirra öryrkja sem fá starfsorku sína aftur að nokkru eða öllu leyti. Sömuleiðis ber stjórn sjóðsins að hækka örorkulífeyrinn ef örorkan vex til muna og án sjálfskaparvita frá því sem hún var metin við fyrri ákvarðanir enda hafi öryrkinn á þeim tíma sem örorkan óx ekki verið í þjónustu annarra en þeirra aðila sem tryggja starfsfólk sitt í sjóðnum.

15. gr.

Nú andast sjóðfélagi og lætur eftir sig maka á lífi og á þá hinn eftirlifandi maki rétt til lífeyris úr sjóðnum. Upphæð makalífeyris er helmingur af áunnum ellilífeyrisrétti hins látna sjóðfélaga. Hafi hinn látni sjóðfélagi verið í starfi er veitti honum aðild að sjóðnum við andlátíð eða hafið töku lífeyris úr sjóðnum fyrir andlátíð hækkar makalífeyririnn um 20% af launum þeim er hann miðast við. Sama gildir hafi hinn látni sjóðfélagi greitt iðgjöld til sjóðsins sem nemur iðgjaldagreiðslum af fullu starfi í 15 ár eða meira enda hafi hann ekki greitt iðgjöld til annars lífeyrissjóðs eftir að greiðslum til þessa sjóðs lauk. Sé makalífeyrir samkvæmt næstu málsgrein hér á undan lægri en tvöfaldur einstaklingslífeyrir almannatrygginga skal greiða úr sjóðnum þeim makalífeyrisþegum sem rétt eiga á maka- eða ellilífeyri frá almannatryggingum það sem á vantar að samanlagður lífeyrir þeirra nái tvöföldum einstaklingslífeyri almannatrygginga. Þó skal greiðsla sjóðsins aldrei fara fram úr hundraðshlutum þeim sem nefndir eru í 2. mgr. þessarar greinar. Nú hefur sjóðfélagi gengið í hjónaband eftir að hann var orðin 60 ára eða á þeim tíma er hann naut lífeyris úr sjóðnum eða hann var lagstur banaleguna og úrskurðar þá stjórn sjóðsins hvort eftirlifandi maki hans skuli njóta lífeyris úr sjóðnum eða eigi. Réttur til lífeyris skv. þessari grein fellur niður ef hinn eftirlifandi maki gengur í hjónaband að nýju en kemur aftur í gildi sé hinu síðara hjónabandi slitið enda veiti hið síðara hjónaband eigi rétt til lífeyris úr sjóðnum. Veiti síðara hjónabandið einnig rétt til lífeyris má eftirlifandi maki velja um hvort hann tekur lífeyrinn eftir fyrri eða síðari makann. Þegar sjóðfélagi deyr sem verið hefur tvígiftur og lætur eftir sig tvo maka á lífi skiptist makalífeyririnn milli þeirra í beinu hlutfalli við þann tíma sem hvor þeirra hefur

verið giftur hinum látna sjóðfélaga á þeim tíma er hann ávann sér lífeyrisréttindi og/eða naut lífeyris úr sjóðnum. Ef annar hinna eftirlifandi maka giftist að nýju fellur allur lífeyrinn til hins en skiptist aftur sé því hjónabandi slitið enda veiti síðara hjónabandið ekki rétt til lífeyris úr sjóðnum eða öðrum hliðstæðum sjóði. Hliðstæð regla gildir séu réttthafar makalífeyris fleiri en tveir. Sama regla gildir ef hinn eftirlifandi maki býr samvistum með manni eða konu meðan samvistum er eigi slitið. Nú lætur sjóðfélagi ekki eftir sig maka en einstæð móðir hans ógift systir hans eða annar ógiftur aðili hefur sannanlega annast heimili hans um árabíl fyrir andlát hans þó eigi skemur en 5 ár og er þá stjórn sjóðsins heimilt að greiða hlutaðeigandi makalífeyri svo sem um ekkju eða ekkil væri að ræða. Á sama hátt er sjóðstjórn heimilt að greiða sambúðarmanni og sambúðarkonu lífeyri ef sjóðfélaginn lætur eftir sig barn innan 18 ára aldurs sem hann hefur átt með hinum eftirlifandi. Einnig er sjóðstjórn heimilt að greiða sambúðarkonu eða sambúðarmanni lífeyri í 24 mánuði þótt ekki sé fullnægt skilyrðum 1. málslíðar um sambúðartíma eða ef sambúðaraðili er 50% öryrki eða meira.

16. gr.

Nú frestar sjóðfélagi að taka eftirlaun og tekur jafnframt við öðru starfi hjá bænum eða stofnunum hans er veitir aðgang að sjóðnum lægra launuðu en því er hann gegndi áður og skal þá reikna eftirlaun eftir því starfinu sem hærra er launað. Sama reglan gildir þegar sjóðfélagi verður af heilsufarsástæðum að láta af stöðu sinni en tekur við öðru léttara og lægra launuðu starfi er veitir aðgang að sjóðnum. Þegar svo stendur á sem í þessari málsgrein ræðir um er sjóðfélaga heimilt að kaupa sér réttindi í sjóðnum fyrir þann tíma sem úr hefur fallið. Stjórn sjóðsins getur krafist vottorðs tryggingayfirlæknis til sönnunar því að sjóðfélaginn verði að láta af stöðu sinni vegna heilsubrests.

17. gr.

Börn og kjörbörn sem sjóðfélaginn lætur eftir sig er hann andast og yngri eru en 18 ára skulu fá lífeyri úr sjóðnum þar til þau eru fullrar 18 ára að aldri enda hafi hinn látni séð um framfærslu þeirra að nokkru eða öllu leyti. Sama gildir um börn og kjörbörn er maður lætur eftir sig er naut eftirlauna eða örorkulífeyris úr sjóðnum er hann andaðist. Ef barnið á foreldri eða kjörforeldra á lífi er sér um framfærslu þess er samanlagður lífeyrir þess frá almannatryggingum og úr þessum sjóði 50% hærri en barnalífeyrir almannatrygginga. Að öðrum kosti er lífeyririnn tvöfaldur barnalífeyrir almannatrygginga. Sama rétt öðlast börn og kjörbörn þeirra sjóðfélaga er njóta eftirlauna eða örorkulífeyris úr sjóðnum þó svo að barnalífeyrir úr þessum sjóði til barna eða kjörbarna örorkulífeyrisþega skal vera jafnmargir hundraðshlutar af fullum barnalífeyri og örorkulífeyrir hans er margir hundraðshlutar af hámarksörorkulífeyri. Fósturbörn er sjóðfélagi hefur framfært að mestu eða öllu leyti njóta sama réttar og börnum og kjörbörnum er veittur hér að framan.

18. gr.

Nú lætur sjóðfélagi í lifanda lífi og af öðrum ástæðum en elli eða örorku af stöðu þeirri er veitti honum aðgang að sjóðnum og fellur þá niður réttur hans og skylda að greiða framvegis iðgjöld til sjóðsins. Hafi sjóðfélagi greitt iðgjöld til sjóðsins í 3 ár eða lengur fellur réttur til elli- örorku- og makalífeyris ekki niður þótt hann hverfi úr sjóðnum en miðast við áunnin lífeyrisrétt þó með þeirri breytingu að makalífeyrir skal þá aðeins nema 1% af launum fyrir hvert iðgjaldagreiðsluár að viðbættu 1/2% af launum fyrir hvert starfsár eftir að iðgjaldagreiðslu lauk sbr. 2. mgr. 15. gr. Hafi iðgjöld verið greidd í skemmri tíma en 3 ár

flytjast þau til B-deildar sjóðsins, geymast þar og veita rétt í samræmi við reglur þeirrar deildar. Sé staða eða starf sjóðfélaga lagt niður á hann rétt á að vera áfram í sjóðnum og greiða iðgjöld sem miðuð séu við laun í þeim launaflokki er staða hans var í er hún var niðurlögð. Nýtur hann þá sömu réttinda úr sjóðnum sem hann hefði gegnt starfi sínu áfram.

19. gr.

Nú flyst sjóðfélagi í starf sem veitir aðgang að öðrum lífeyrissjóði sem stofnaður er með lögum og má þá endurgreiða með vöxtum öll iðgjöld sem greidd hafa verið í sjóðinn hans vegna. Það er skilyrði fyrir þessari endurgreiðslu að hún gangi til kaupa á lífeyrisréttindum fyrir viðkomandi mann í sjóði er hann flyst til. Þó má aldrei endurgreiða hærri upphæð en þarf til kaupa á réttindum í hinum nýja sjóði er svari til þess starfstíma er sjóðfélaginn hafði öðlast. Sjóðstjórninni er heimilt að nota sömu endurgreiðslureglu þegar sjóðfélagi flyst í annan sjóð sem viðurkenndur er af fjármálaráðuneytinu eða kaupir sér lífeyri hjá tryggingarfélagi eða stofnun sem starfar eftir reglum sem fjármálaráðuneytið samþykkir enda gildi þar sömu reglur um endurkaup og greiðslu lífeyris og ákveðnar eru í þessum reglum. Nú gerist maður sjóðfélagi í þessum sjóði og er þá sjóðstjórninni á tilsvarendi hátt heimilt að veita viðtöku fé því er kann að vera endurgreitt hans vegna úr sjóði tryggingarfélagi eða stofnun sem að framan greinir og veita honum réttindi í samræmi við það. Einnig getur stjórnin þegar sérstaklega stendur á heimilað réttindakaup aftur í tímann þó ekki sé um að ræða yfirfærslu á réttindum annar staðar frá. Það skal meðal annars sett sem skilyrði fyrir slíkum réttindakaupum að mælt sé með þeim af forstöðumanni þeirrar stofnunar er starfsmaður vinnur hjá að gengið sé frá réttindakaupum innan árs frá því að starfsmaður var ráðinn og að starfsmaðurinn sé eldri en 30 ára þegar hann öðlast aðgang að sjóðnum. Stjórn sjóðsins ákveður eftir tillögum tryggingafræðings upphæðir þær er greiða skal fyrir réttindi samkvæmt ákvæðum þessarar greinar.

20. gr.

Greiðslur úr sjóðnum skulu inntar af hendi mánaðarlega fyrirfram 1. hvers mánaðar.

21. gr.

Óheimilt er að framselja eða veðsetja lífeyriskröfur samkvæmt reglugerð þessari og ekki má leggja á þær lögghald né gera í þeim fjárnám eða lögtak.

22. gr.

Sjóðfélagar sem fengið hafa lífeyri úr sjóðnum fyrir 1. janúar 1964 skulu fá greiddan lífeyri samkvæmt ákvæðum þessarar reglugerðar frá gildistöku hennar.

23. gr.

Þeir sem orðnir voru sjóðfélagar fyrir gildistöku reglugerðar þessarar og eiga betri lífeyrisrétt samkvæmt eldri reglugerð sjóðsins skulu halda honum.

24. gr.

Nú verður almenn hækkun á áður úrskurðuðum eftirlaunum örorku- og makalífeyri vegna almennrar hækkunar á launum fastráðinna bæjarstarfsmanna sbr. 12., 13., 14. og 15. gr. og endurgreiðir þá bæjarsjóður og viðkomandi stofnanir bæjarins þá hækkun er þannig verður á lífeyrisgreiðslum til sjóðsins.

25. gr.

Auk aðalsjóðsins sem ákvæði 1. - 24. gr. reglugerðar þessarar gilda um skal vera til sérstök deild er nefnist B-deild fyrir þá starfsmenn 16 ára og eldri sem laun taka samkvæmt kjarasamningi Akureyrarbæjar og STAK en eiga ekki aðild að sjóðnum samkvæmt 3. gr. Í B-deild geta ennfremur verið þeir sjóðfélagar aðalsjóðsins sem hafið hafa töku eftirlauna og lokið réttindavinnslu þar en halda áfram starfi hjá bænum. Ennfremur eiga aðild að B-deild þeir sjóðfélagar sem látið hafa af starfi en greitt iðgjöld til A-deildar skemmri tíma en 3 ár (sbr. 18.gr.) Aðalsjóðurinn og B-deild hans skulu hafa sameiginlegan fjárhag. Iðgjöld starfsmanna skulu vera 4% af föstum mánaðarlaunum en vinnuveitandi greiði 6%. Um lífeyrisréttindi er iðgjaldagreiðslur þessar veita skulu gilda bótaákvæði Söfnunarsjóðs lífeyrisréttinda samkvæmt lögum nr. 95/1980.

26. gr.

Breytingar á reglugerð þessari eru háðar samþykki bæjarstjórnar Akureyrar og STAK.

27. gr.

Reglugerð þessi gildir frá 1. maí 1996 og var gerð breyting á 24. gr. reglugerðarinnar. Fellur þá jafnframt úr gildi reglugerð sjóðsins frá 1. febrúar 1994.

Samþykkt í bæjarstjórn Akureyrar og stjórn STAK,
1. maí 1996.

Með tilvísun til laga nr. 55/1980 staðfestist reglugerð þessi hér með.

Fjármálaráðuneytinu, 19. ágúst 1996.

F. h. r.

Áslaug Guðjónsdóttir.

Hermann Jónasson.

REGLUGERÐ

**um breytingu á reglugerð nr. 261/1995 um undanþágur
frá lögheimilisskilyrði sjúkratrygginga.**

1. gr.

Við 2. gr. bætist nýr liður sem verði f liður og orðist svo:

- f) Þegar um er að ræða einstakling sem íslenska ríkisstjórnin hefur veitt hæli sem flóttamanni.

2. gr.

Reglugerð þessi sem sett er með stoð í 4. mgr. 32. gr. laga um almannatryggingar, nr. 117/1993, öðlast þegar gildi.

Heilbrigðis- og tryggingamálaráðuneytinu, 28. ágúst 1996.

Ingibjörg Pálmadóttir.

Ragnheiður Haraldsdóttir.